

V E N D I M
Nr.304, datë 8.5.2003

**PËR MBULIMIN E SHPENZIMEVE TË UDHËTIMEVE DHE PËR DIETAT PËR
PUNONJËSIT E MINISTRIVE DHE TË INSTITUCIONEVE BUXHETORE, KUR DALIN
JASHTË SHTETIT**

Në mbështetje të nenit 100 të Kushtetutës dhe të nenit 7 të ligjit nr.8379, datë 29.7.1998 “Për hartimin dhe zbatimin e Buxhetit të Shtetit të Republikës së Shqipërisë”, me propozimin e Ministrit të Financave, Këshilli i Ministrave

V E N D O S I:

1. Përfitojnë shpenzime udhëtimi dhe dieta në valutë të huaj:

Punonjësit e ministrive, të institucioneve, ndërmarrjeve shtetërore etj., që dërgohen me shërbim si anëtarë delegacionesh për konferenca, veprimtari të ndryshme ndërkombëtare, bisedime për marrëveshje, biznes, anëtarë të ekipeve kulturore dhe sportive dhe punonjësit e përfaqësive tona jashtë shtetit, kur emërohen, transferohen, dërgohen me shërbim jashtë përfaqësisë ose në ndonjë shtet tjetër të huaj dhe kur kthehen në atdhe me shërbim ose kur transferohen.

2. Për efekt të llogaritjes së shpenzimeve të udhëtimeve dhe dietave, personat ndahen sipas funksioneve, në tre kategori:

a) Në kategorinë e parë përfshihen personalitetet e larta shtetërore si: Presidenti i Republikës, Kryeministri, Kryetari i Kuvendit, Zëvendëskryeministri, Nënkryetari i Kuvendit, ministrat dhe funksionarë të tjerë që barazohen në pagë me ta, deputetët, zëvendësm ministrat, sekretarët e përgjithshëm të ministrive dhe funksionarë të tjerë, që barazohen me ta në pagë.

b) Në kategorinë e dytë përfshihen: ambasadori, ministri fuqiplotë i ngarkuari me punë në shtete të huaja, konsulli i përgjithshëm, drejtorët e drejtorive në ministri dhe institucionet e tjera qendrore dhe funksionet e tjera, që barazohen në paga me ta, si dhe punonjësit që kanë titullin shkencor “profesor”.

c) Në kategorinë e tretë përfshihen: të gjithë punonjësit e tjerë të ministrive, institucioneve dhe përfaqësive, që nuk përmenden në shkronjat “a” dhe “b”.

3. Masa e dietave, sipas kategorive dhe funksioneve për çdo kategori, paraqitet në lidhjen 1, që i bashkëlidhet këtij vendimi si pjesë e pandarë e tij.

4. Shpenzimet e udhëtimit dhe dietat për vendet e kontinentit europian do të jenë në euro, ndërsa për vendet e kontinenteve të tjera do të jenë USD (dollarë amerikanë).

5. Kur shpenzimet janë në ngarkim të palës pritëse, si të qeverive të shteteve të ndryshme, të institucioneve dhe organizatave ndërkombëtare, të cilat u sigurojnë personave, që përfitojnë dieta sipas këtij vendimi, vetëm shpenzimet e ushqimit dhe të fjetjes, pa u paguar asgjë në cash, atëherë këta persona përfitojnë nga buxheti i institucionit të tyre vetëm shpenzime të vogla (para xhepi), të përcaktuara në lidhjen 2, që i bashkëlidhet këtij vendimi dhe që është pjesë e pandarë e tij.

6. Kur shpenzimet janë në ngarkim të palës pritëse, që do të thotë se paguan tërësisht ose pjesërisht në cash dhe pjesërisht hotelin dhe restorantin, pavarësisht nga masa e dietës që paguan shteti ynë për këto raste, personat nuk përfitojnë asgjë nga buxheti i institucionit të tyre dhe nuk i detyrohen asgjë këtij institucioni.

7. Kur punonjësit e përfaqësive tona jashtë shtetit emërohen ose transferohen, marrin dietën e kategorisë përkatëse, ndërsa kur shoqërohen nga bashkëshortja/bashkëshorti, këta të fundit marrin dietën e kategorisë së tretë.

8. Shpenzimet e fjetjes dhe të udhëtimit për familjet e punonjësve të përfaqësive, që emërohen ose transferohen, përballohen nga shteti.

9. Me fondet e planifikuara për institucionet buxhetore, përveç shpenzimeve të transportit, vajtje jashtë shtetit e kthim, sipas urdhrit të drejtuesit të institucionit përkatës, të përballohen edhe shpenzimet e transportit brenda shtetit ku kryhet shërbimi, siç janë shpenzimet nga aeroporti në destinacion dhe anasjelltas, shpenzimet për lëvizjen nëpër qytete për nevoja pune, brenda shtetit përkatës, si dhe shpenzimet brenda qytetit ku kryhet shërbimi, për distanca të largëta, kur këto nuk vlerësohen si transport urban (për transportin urban shpenzimet përballohen nga vetë punonjësit).

10. Shpenzimet e fjetjes, të transportit dhe shpenzimet e tjera në ngarkim të shtetit, për të gjitha rastet, njihen sipas dokumentit përkatës (faturës, biletës etj.).

11. Pikat 14, 15, 16, 17, 19 dhe 20 të vendimit nr.473, datë 29.9.1993 të Këshillit të Ministrave dhe vendimet nr.463, datë 16.9.1993 e nr.48, datë 21.2.1994 të Këshillit të Ministrave, shfuqizohen.

12. Ngarkohen Ministri i Financave dhe Ministri i Punëve të Jashtme të nxjerrin udhëzimin e përbashkët për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano

Lidhja 1:	Në euro	Në doll U.S.A.
Për masën e dietave për jashtë shtetit konform pikës 3 të vendimit të Këshillit të Ministrave “Për shpenzimet e udhëtimeve dhe dietave jashtë shtetit për punonjësit e ministrive dhe institucioneve buxhetore”		
Për kategorinë e I-rë		
1.Presidenti i Republikës	100	100
2.Kryeministri dhe Kryetari i Kuvendit	80	80
3.Zëvendëskryeministri dhe Nënkryetari i Kuvendit ministrat, dhe funksionarët e tjerë që barazohen me ta në pagë	70	70
4.Deputetët e Kuvendit dhe funksionarët e tjerë që barazohen me ta në pagë	60	60
5. Zëvendësministrat, sekretarët e përgjithshëm të ministrive dhe institucioneve buxhetore dhe funksionarë të tjerë që barazohen me ta në pagë	50	50
Për kategorinë e II-të		
Ambasadorët, ministrat fuqiplotë të ngarkuarit me punë në shtetet e huaja, konsulli i përgjithshëm, drejtorët e drejtorive në ministri dhe institucionet e tjera buxhetore, punonjësit me titull shkencor “profesor” dhe të gjitha funksionet e tjera që barazohen me ta në pagë	40	40
Për kategorinë e III-të		
1.Të gjithë punonjësit e tjerë të ministrive dhe institucioneve buxhetore	35	35
Lidhja 2:	Në euro	Në doll U.S.A.
Për masën e shpenzimeve të vogla për jashtë shtetit konformë pikës 5 të vendimit të Këshillit të Ministrave “Për shpenzimet e udhëtimit dhe dietave jashtë shtetit për punonjësit e ministrive dhe institucioneve buxhetore”.		
1. Kategoria e parë		
40 për qind e dietës sipas lidhjes 1 për çdo funksion		
2. Kategoria e dytë		
Ambasadorët, ministrat fuqiplotë të ngarkuarit me punë në shtete të huaja, konsulli i përgjithshëm, drejtorët e drejtorive në ministri dhe institucione të tjera buxhetore, punonjës me titull shkencor “profesor” dhe funksione të tjera që barazohen me ta në pagë	15	15
3. Kategoria e tretë		
Të gjithë punonjësit e tjerë të ministrive dhe institucioneve të		

tjera buxhetore, përfaqësive etj.

12

12